

Incumbensa Wilhelm concernent la mitigaziun da perditas pervia da l'annullaziun d'occurrenzas grondas e da congress

Tenor ina communicaziun da la Regenza grischuna dal 1. d'october 2020 n'haja il turissem en il Grischun betg patì uschè fitg da la crisa da corona sco spetgà. Ma il maletg general na saja betg per tut las destinaziuns il medem. I dat cleras differenzas localas. Pernottaziuns che vegnan generadas tras occurrenzas grondas u tras congress n'han numnadain betg lieu. Ils fatgs da congress èn paralisads, occurrenzas grondas ston vegnir annulladas pervia da la pandemia, cumbain ch'ellas fissan teoreticain permissas.

Quest svilup fa fitg gronds quitads en vista al proxim avegnir. Differentas occurrenzas grondas (WEF, Cuppa Spengler, Higa, cursas da la FIS, Maraton da passlung da l'Engiadina e.u.v.) èn annulladas. Creaziuns da valurs en l'autezza da blers milliuns francs vegnan uschia a mancar ed existenzas economicas vegnan periclitadas. Gestunarias e gestunaris d'infrastructuras relevantas per il sistem sco er organisaturas ed organisaturs d'occurrenzas grondas vegnan sut ina pressiu finanzia enorma. Al Club da hockey da Tavau per exempel vegnan a mancar durant la stagiun regulara entradas da milliuns pervia da l'annullaziun da la Cuppa Spengler e pervia da la reducziun dal dumber d'aspectaturas ed aspectaturs en consequenza da la pandemia. L'Expo Chur SA cumbatta per sia existenza. L'organisaziun da la destinaziun Tavau sto supportar perditas massivas en ils fatgs da congress e dovra sustegn. Ed uschia vinavant.

Ils fatgs da congress e d'occurrenzas pateschan per il mument dramaticain, ed in svelt return a la normalità n'è betg en vista. Senza dubi vegnan models da congress novs ed innovativs a procurar per remedura. Ma igl è illusoric da pudair cumpensar a curta vista las perditas ch'èn da spetgar.

Pervia da quai na d'ovri betg mo innovaziuns per l'avegnir, mabain er agids transitoris. Concretain ston vegnir mitigadas las perditas pervia da la pandemia, perquai che infrastructuras da turissem, da sport e da cultura èn sutoccupadas e perquai che occurrenzas grondas, sco la Cuppa Spengler, èn annulladas. Betg sco ultim duai uschia vegnir impedi che interpresas resp. organisaziuns sco er lur furnituras e furniturs fetschian concurs. Perquai che concretain er gestunarias e gestunaris d'infrastructuras relevantas per il sistem da l'entir chantun (centers da congress, hallas da glatsch, infrastructuras da sport e da cultura) èn pertutgads resp. periclitads, sto er il chantun surpigliar sia responsabladad. Ensem cun la citad da Son Gagl ha per exempel il chantun Son Gagl decidì in vast sustegn per l'exposiziun Olma.

Sin basa da las explicaziuns dattan las sutsegnadras ed ils sutsegnaders las suandantas incumbensas a la Regenza:

Cun gronda urgenza temporala prenda il chantun mesiras per mitigiar perditas d'entradas tar las organisaturas ed ils organisaturs sco er tar las gestunarias ed ils gestunaris d'infrastructuras relevantas per il sistem en consequenza da l'annullaziun d'occurrenzas grondas e da congress (turissem MICE). Sche necessari stgaffescha il chantun las basas giuridicas necessarias en chaussa.

Cuira, ils 22 d'october 2020

Wilhelm, Schneider, Preisig, Baselgia-Brunner, Berther, Berweger, Bettinaglio, Cahenzli-Philipp, Caluori, Cantieni, Caviezel (Cuira), Caviezel (Tavau Clavadel), Clalüna, Della Cà, Della Vedova, Deplazes (Rabius), Dürler, Ellemunter, Engler, Epp, Favre Accola, Felix, Föhn, Gartmann-Albin, Grass, Hofmann, Hohl, Holzinger-Loretz, Horrer, Kasper, Kienz, Koch, Kunz (Fläsch), Lamprecht, Loi, Märchy-Caduff, Marti, Müller (Favugn), Müller (Susch), Natter, Niggli (Samedan), Paterlini, Perl, Pfäffli, Rettich, Ruckstuhl, Rutishauser, Salis, Schwärzel, Stiffler, Gort, Ulber, Valär, von Ballmoos, Waidacher, Weidmann, Wellig, Widmer (Favugn), Widmer-Spreiter (Cuira), Zanetti (Landquart), Donatsch, Gasser (Schiers), Giudicetti, Pajic, Spadarotto, Spreiter, Tomaschett (Cuira)